



Jeni a gredi 3. Ana raha zhomu kwa kukala akwenye kilasi kisha. Mwalimuwe ni Madamu Orina. Anamuhendza mwalimuwe zhomu.

Mwalimu iye wamufundisha Jeni hangu arihongira Sikuli ya Musinji ya Makutano. Mwaka ndo udzaandza. Madamu Orina anaafundisha anafundzi maut'u masha.

Manamusirikiza. Anaafundisha maira masha. Kisha nikukala anaanira ngano nyinji. Kila mut'u mo kilasini ananena kuhusu ukongo musha.






Kila mut'u ho ndani ya sikuli ananena kuhusu ukongo wa kwangalaza. Ukongo wenye unaifwa vidudu zha k'orona. Angine manawiha COVID-19. Ni ukongo musha. Madamu Macharia k'adzaambira ahoho kuhusu ukongo uu musha.

Alimu nao mananena kuhusu ukongo uu musha wa COVID-19. Anafundzi ho sikuli mananena kuhusu wo ukongo pia. Azhazi mudzini madengene kuhusu ukongo uu.

Mananena kuhusu Covid-19 kahiza simu zao. Maredio ganamboza habari kwa at'u kuhusu Covid-19. Kwenye t'elevisheni moro ni uwo wa kuhusu ukongo uwo musha. Raisi wa Kenya naye ananena kuhusu Covid-19.





At’u anji k’amadzamanya sana kuhusu Covid-19. Angine maona ni ulongo. Maamba ukongo uwo k’auko.

“Covid-19 ni aina ya mafua thu. “At’u angine makiamba.

“Ni peho irokudza kische indakwenda. K’ahana haja ya kugoha.” angine makiamba.

Angine madh’ania kukala Covid-19 were ni lana kula kwa Mulungu. Ao maamba kukala k’akuna ngira yoyosi at’u madimayo kuuepukira. At’u were magazhikana.





Siku mwenga raisi watangaza kukala ukongo uwo were udzafika Kenya. Mut'u mumwenga were anaangwa adzaupata ukongo uu ugofwao.

At'u osi makala na woga munji. Bai ukongo uwo waandza kuenea here moho wa ts'andzala. At'u anji enye mumu Kenya mapata Covid-19. Angine hatha mafwa kamare kwa ukongo uwo.

Sharia nyingi zaikwa ili at'u mazithuwirize. Sharia zizi were ni za kuuhenda ukongo uu usienee bule. Sikuli zosi zafungwa. Jeni na anafundzi andzie k'amendere sikuli kaheri.





Ukongo wa Covid-19 una dalili nyinji zenye. At'u enye homa kali manaadhw'a mende makamone dakithari. Na o marekala manakolola nao were ni mende makamale matibabu.

Kuna aryahu ambao were mana thabu za kusoha t'o t'o t'o. Aa nao were manamalwa makamone dakithari.

At'u marekala mana ukongo wa kumwaga na kulumwa ni mungo were nao nimende sipitali haraka.






Yo Wizara ya Afiya yaafundisha at'u maut'u manji. Mwenga raho were ni kukolola henye kikokora.

At'u maangwa mahumire kithambara kala manamik'a mamira. Maangwa mavifule zho vithambara na sabuni.

At'u maangwa masigut'e milomo yao, matso na p'ula kala mikono ni michafu. Hathua zosi zizi zambozwa ili kuzulia kuenea kwa vidudu ya K'orona.






At'u maangwa makale makiigesa mikono yao na sabuni makihumira madzi . Kugesha mikono kunafuhendya fukale huru kula kwa kirusi kiki.

Kila wakathi mut'u ambolaho mudzini k'wak'we niagese mikonoye. Hatha ahoho nao were nimagese mikono yao mara kwa mara.

Kila mut'u ho mudzini vivi were akagesa mikonoye siku ndzima. Were funamala fudzich'inge sidze fukapatwa ni Covid-19.





Ikikala k'ahana madzi, at'u mambirwa maisafishe mikono yao na vitakasa mikono. At'u anji k'amaihendzere yo harufu ya vitakasa mikono

O enye were k'amendzi kuihumira dawa iyo were manamalwa maigese mikono yao kabila kungira dhukani. Aguzi a madhuka mahakikisha kukala vivi vinahendwa.

Kabadhi ka aguzi a madhuka k'akaaguzirire at'u ambao makahala kuigesa mikono yao. Magoha kukala vivi vinadima kueneza Covid-19 kwa at'u angine mandiokudza gula vit'u.





Maafisaa a idaya ya afiya mamboza lagizo. H'atu ambaho at'u nikukala managut'a kila mara hasafishwe. Hali ii yasaidhiya kuzuliya kusambaa kwa vidudu zha K'orona, virehazh'o Covid-19

Maamba kukala magari gosi ga abiriya gatakaswe na vitakasiro. Matatu zalagizwa kubeba at'u achache ili kuchinga thele ra at'u.

Hali ii yasaidhiya abiriya kukala huru na magari ga abiriya. Pore pore matatu zizo zakala thele kaheri.



Ukongo wa Covid-19 waendera kuenea mumu K'anya. At'u osi mambirwa mavale barakowa. At'u anji magoha kuaona at'u madzavala barakowa.

At'u mambirwa mavale barak'owa t'o t'o t'o. Barak'owa ni suthi iziye wo mulomo na yo p'ula. Kabila ukongo uu wa Covid-19 kudza, ni madakithari h'akeye ndio marevala barakowa. Bai kila mut'u wakala anaonekana here dakithari.

At'u maandza kudzitengenezera barak'owa. Mandhika maut'u tafauti tafauti kahiza zo barak'owa. Angine mandhika "Mulungu anakuhendza", "Naihenza K'anya," "Nafuizuliye Covid-19" na maut'u manginge manji.






Maofisaa a Wizara ya Afiya maambira at'u mabaki midzini. Maofisaa ao maambira at'u masende kut'u kwenye at'u anji ili mazuliye Covid-19.

Sikuli zosi zabaki kufungwa. At'u mariokala manahenda kazi maofisini maadhwa mahende kazi zao kumbola midzini. At'u maadhwa maime kure na andziyao makalaho henye hat'u henye at'u anji.

At'u pia maangwa masilamusane kwa kup'ana mikono. Hathua ii yaikwa ili izuliye ukongo uu na kuenea na kumbola kwa mut'u mumwenga hatha kwa mut'u mungine.






Wakathi uu wosi sikuli were zidzabaki kufungwa. Jeni na kabadhi ka andzie mashomao osi were mana bahathi zhomu. Mwalimu wao Madamu Orina were anambola kwenye riro lalo rao.

Kwenye ii likizo nyire waarehera anafundzi aa karedio ka kwakwe kath'ithe. Mamusirikiza ye mwalimu wa redioni kumbola Redio ya Edu.

Madamu Orina waelezera anafundzie mashomo gago. Anafundzi kumbola sikuli nyingine nao makudza sirikiza vipindi vizho zha kusirikiza. Mahendzezha ni mafundishoge. Azhazi nao were mana raha zhomu.





Kuna anafundzi mario magathuwiriza mashomo gago kwenye vipindi zha T’vii ya Edu. Were kuna alimu tafauti a mashomo tafauti.

Anafundzi anji k’amamanyire wo wakathi ambawo go mashomo ga vilasi zhao were ganadza. Malolore go mashomo gosi. Madzifundisha maut’u manji.

Wakathi mungine ye mwalimu wa T’viini wauza maswali. Nao makindhika majibu kwenye vithabu zhao. Anafundzi osi mamuhendza zhomu aa alimu asha.





Kuna anafundzi mario magathuwiriza mashomo gaga kumbola simuni. Bai hatha majibu maswali ga kila shomo.

Sikuli zingine zaahumira anafundzi ao mashomo ga kuafundishira. Kwao were sikuli ndizo zidzizofungwa ela vithabu were vidzabaki lwavu.

Kuna sikuli ambazo zinaenderera kuafundisha anafundzi ao kwa kuumira mashomo ga simuni. Anafundzi manahendza mashomo ga simuni zhomu. Maamba kukala ganaafahiza.






Bai likizo ii nyire yagoma. Sikuli zavugulwa kaheri. Zhakala vidzakala muda mure hangu anafundzi makale mo sikuli.

Makala na raha zhomu kwa kuuya kaheri sikuli. Alimu nao were mana raha zhomu kwa kuuya sikuli.

Maut'u manjigabadhilika. Anafundzi osi were ni suthi magese mikomo ho sikuli. Were ni suthi mapimwe dzoho ra miiri yao. Anafundzi were ni makale kure-kure.

“Ano alimu mandanisikira jeri nikijibu swali na ino barak'owa?”
Jane wadangana.





Mwishowe kukikala na ugoro udzo! Ch'anjo ya Covid-19 ikipatikana. At'u mariopata ch'anjo iyo k'amalumizirwe sana ni Covid-19.

“Undanihirika nende nikadungwe yo ch'anjo ya COVID-19?”
Jane akimuzama mameye.

“Hatha bule” mameye akimujibu.

“Kwa wakathi uu iyo ch'anjo ya COVID-19 ni kwa ajili ya maafisaa a afiya, mapolisi, alimu na athumia,” Mameye achenderera.

Ukongo wa COVID-19 kaudzagoma bule. Udzalaga at'u anji. At'u machere kuwagoha ukongo uu. Imani ya Jane ni kwamba sikuli zizifungwe kaheri kwa muda mure kwa sababu ya ukongo uu.

